

Malaysia contoh terbaik negara Islam

Utusan Online

27 April, 2013

SEREMBAN 26 April - Malaysia menjadi model kepada negara Islam lain terutama dalam aspek menyatupadukan ummah serta masyarakat pelbagai kaum.

Timbalan Perdana Menteri, Tan Sri Muhyiddin Yassin berkata, pengiktirafan itu dibuat Imam Masjid Nabawi, Madinah, Shaikh Solah Mohammed al-Budair ketika berada di negara ini baru-baru ini.

"Kejayaan Malaysia sebagai negara Islam ini menurut Shaikh Solah, harus terus menjadi contoh dan teladan bagi umat Islam di negara-negara Islam yang lain.

"Kenyataan beliau itu saya ambil sebagai salah satu manifestasi pengakuan pemimpin dan tokoh-tokoh Islam di negara lain tentang apa yang telah kita lakukan di sini," katanya.

Beliau berucap pada majlis makan tengah hari bersama rakyat selepas solat Jumaat di Masjid Taman Tuanku Ja'afar, dekat sini hari ini.

Yang turut hadir, Menteri Besar, Datuk Seri Mohamad Hasan, Ketua Pemuda BN, Khairy Jamaluddin serta calon Barisan Nasional (BN) kerusi Dewan Undangan Negeri (DUN) Paroi, Mohd. Ghazali Abd. Wahid.

Jelas Muhyiddin, umat Islam perlu sedar ancaman perpaduan di negara ini adalah nyata sekali gus mustahak bagi mereka mewujudkan kesatuan dan kesefahaman lebih rapat dengan pemimpin kerajaan.

Katanya, dua elemen berkenaan adalah penting supaya asas-asas Islam yang dibentuk dan segala usaha yang dilakukan untuk menyemarakkan syiar Islam di Malaysia dapat dipertahankan.

Dalam masa sama, Muhyiddin mengajak umat Islam berganding bahu mendukung cita-cita bersama pemimpin negara ketika ini membangunkan negara dengan lebih berjaya.

"Dalam masa sama, kita akan mempertahankan akidah Islam dan apa sahaja yang telah kita bina selama ini supaya tiada mana-mana pihak mencabarnya dan membawa ideologi bertentangan dengan iktikad Ahli Sunnah Wal Jamaah," katanya.

Hakcipta Terpelihara © UTUSAN MELAYU (M) BERHAD

Source : http://www.utusan.com.my/utusan/Dalam_Negeri/20130427/dn_04/Malaysia-contoh-terbaik-negara-Islam#ixzz2ZopkyARE